

DISSERTATIO INAUGURALIS MEDICO-OBSTETRICALIS
DE
PARTU
PRÆTERNATURALI
PROPTER CLUNES
AD
OS UTERI CONVERSAS.

QUAM
DIVINIS SUB AUSPICIIS
EX AUCTORITATE
GRATIOSISSIMÆ FACULTATIS MEDICÆ
IN ALMA ARGENTORATENSIVM UNIVERSITATE

PRO LICENTIA
SUMMOS IN MEDICINA HONORES
ET PRIVILEGIA DOCTORALIA
RITE CAPESSENDI

DIE XXVIII. SEPTEMBR. MDCCLXXIII.

SOLENNI ERUDITORUM DISQUISITIONI

SUBJICIET

PETRUS GEORGIUS WEYER

RIGA - LIVONUS.

H. L. Q. C.



ARGENTORATI

Typis JOH. HENRICI HEITZII Universitatis Typographi.



V I R O

PRÆNOBILISSIMO EXPERIENTISSIMO

DOMINO

ANTONIO TRUHART

MEDICINÆ DOCTORI

ATQUE

PRACTICO FELICISSIMO

SERENISSIMO DUCI SAXO-MEINÜNGENSI

A CONSILIIS AULÆ

PHYSICO PRIMARIO APUD RIGENSES

PATRONO ATQUE FAUTORI SUO

OMNI PIETATIS ET OBSERVANTIÆ CULTU

ÆTERNUM COLENDO

DISSERTATIONEM HANC

IN OBSEQUII DEVOTISSIMI PIGNUS

GRATISSIMI ANIMI MONUMENTUM

ULTERIOREMQUE SUI COMMENDATIONEM

CONSECRAT

AUCTOR.



§. I.



e partu, qui clunibus prævius est, acturi, haud abs re fore existimamus, si in ipso tractationis limine, paucis, cuinam partus classi, naturalibus an præternaturalibus, ille de quo nobis nunc erit sermo, accensendus sit, dispiciamus. Non una omnibus hic stat sententia. Veteres cum Magno HIPPOCRATE scientiæ salutaris Conditore eum præternaturalibus annumerare, nulli dubitarunt. Eidem adstipulantur recentiorum obstetricantium numerosa turba. Pauciores sunt, qui in diversa eunt, inter quos tamen magni nominis Viri LA MOTTE, HEISTERUM, STORCHIUM, CRANTZIUM atque DELEURYE



nominasse sufficiat. Hi partum dictum ad naturales referunt, & quidem sequentibus potissimum excaussis:

I. Quia non adeo raro obvius est.

II. Quia sæpe a sola natura feliciter ad finem perducitur.

§. II.

Ne vero tota hæc disceptatio in meram Logomachiam abeat, ante omnia accurate evolvenda ac determinanda erit, partus, qui κατὰ Φύσιν, secundum naturam, fieri dicitur, idea. Naturalis partus HIPPOCRATI audit, quando caput foetus prævium est; sin vero sequatur alia parte prodeunte, præter naturam id evenire vult. Plura sunt loca, quæ mentem hujus Viri declarant. *T. I. Opp. περὶ Φύσεως παιδὸς* §. 37. pag. 159. Edit. quæ Lugduni Batav. 1665. prodiit, hæc leguntur: χωρεῖ ἐπὶ κεφαλὴν εἰ κατὰ Φύσιν ἦ, procedit capite, si secundum naturam proderit. cf. *L. I. περὶ γυναικείων* §. 93. p. 481. & §. 94. p. 482. Ad hunc, ex mea quidem sententia, hæc tria inprimis requiri arbitror:

a) Ut foetus tempore a natura definito in lucem edatur.

b) Ut situm convenientem habeat.

c) Ut absque vitæ periculo matris æque ac infantis a sola natura excludatur.

§. III.

Horum requisitorum ulteriorem explicationem mihi nunc subjungere animus est : tum enim, an ea partui nostro applicari possint nec ne, dijudicatu facile erit. Primum quod attinet, nemo artis nostræ peritus ibit inficias, naturam foetui certum tempus destinasse, intra quod ad eam maturitatem perveniret, quæ ipsi, ut in hoc mundo, nova ab illa, qua in utero gaudebat, valde diversa vita frui posset, necessaria erat. Terminum hunc a natura præfixum noni mensis finem esse, omnibus & lipis notum & tonforibus. Plerique enim infantum hoc termino nati sana ac vegeta corporis constitutione utuntur; cum e contrario foetus *præmaturi* a) de-

a) Notes hic velim, foetum, respectu habito ad tempus, quo prodit



biles sint, ac per omne id tempus, quo adhuc in utero morari debuissent, continuo fere somno indulgeant. Quidquod, nisi summa cura adhibeatur, infirma eorum vita vix ac ne vix quidem conservetur. Immaturorum vix unum atque alterum vitam servare, constat. Maximam foetuum partem, qui clunibus præviis eduntur, immaturos vel præmaturos nasci, plurium annorum experientia Præceptori meo Clar. FRIDIO persuasit; ex tredecim enim hoc modo natis, novem immaturos observavit. Has Præceptoris observationes GIFFARDI, LA MOTTE, MAURICEAU atque SMELLIE observationibus corroborare confidebam, ast me spes fefellit, rarissime enim dicti Observatores de foetus ætate mentionem fecerunt.

§. IV.

Ad alterum requisitum, ut nimirum foetus situm

ex utero, esse vel *præmaturum* vel *immaturum* vel *abortum*. *Præmaturus*, (*frühzeitig*) nobis est, qui a septimo usque ad dimidium noni mensis editur. *Immaturus* (*unzeitig*) vocatur, qui septimum præcedit, nec tamen ultra dimidiam graviditatem ascendit. *Abortus* (*falsche Empfängniß*, *fausse-couche*) a conceptione ad quartum mensem porrigitur. Veteres hanc distinctionem ignorasse, non opus est ut moneam.



convenientem habeat, hæc notamus: Omnes fere obstetricantes conveniunt, foetus naturalem situm hunc esse, quando caput ejus ponderosum, eo quo decet modo, uteri orificio obversum est. Illam speciem partus, ubi caput prævium uteri orificio sese sistit, (de foetu maturo loquor) ceteras simul sumtas, longe superare, experientia magistra didicimus; e contrario extra omne dubium positum est, naturalem atque consuetum foetuum immaturorum ac præmaturorum situm esse, cum nates uteri orificium spectant. Hunc situm enim tam diu servant, usque dum debita atque plenaria peracta circumvolutione, caput uteri orificio insistat. Si itaque foetus maturus illum situm, quo nates uteri orificio incumbunt, tenet, causam quandam adfuisse, quæ naturalem foetus circumvolutionem impedivit, certum est; sed hac de re infra dicendum.

§. V.

Pergimus nunc ad tertium partus naturalis requisitum. Experientia docet, naturam, in illo partus genere, ubi caput prius situ conveniente prodit; plerum-



que solam sufficere, ut foetus absque periculo in lucem edatur. At quis obstetricantium ignorat, quod si natura sola interdum polleat, partum nostrum aut aliam præternaturalium speciem perficere, tamen foetum in hac partus specie, vix non semper periculo, vitam, ob funiculi umbilicalis compressionem, amittendi, antequam lucem aspexerit, esse obnoxiam *b*).

§. VI.

Quodsi nunc quis consideret :

I. Plurimos foetus, qui clunibus præviis nascuntur, vel immaturos vel præmaturos esse.

b) Foetum, ad vitæ conservationem, tamdiu libero sanguinis circulo per funiculum indigere, usque dum respirare possit, nemini non notum. Cum itaque in qualibet partus specie, ubi foetus alia, quam capite, parte prodit, funiculus, quamdiu foetus supra clunes nascitur, comprimitur, liber sanguinis circulus impeditur, & respiratio nonnisi toto corpore protruso incipit; e contrario, funiculus, in partu capite prævio, tum demum comprimitur, quando caput & pectus jam prodierunt; hoc modo vero funiculi pressio foetui amplius causa mortis esse nequit, quia libenter inspirare potest. Conficitur itaque vel ex funis umbilicalis in abdomen insertionem, quod partus capite prævius tantum naturalis jure dici mereatur.

2. Situm clunibus præviis , non nisi immuturo-
rum ac præmaturorum foetuum, naturalem atque
consuetum esse; &

3 Foetus illos, hoc in situ editos, maxime peri-
culo vitam amittendi, antequam hujus terræ lux
ipsis orta fuit, obnoxios esse.

Nobiscum, nisi qui præjudiciis occæcatus fuerit,
partum clunibus præviis nullo modo naturalibus,
sed summo jure præternaturalibus partibus annu-
merandum esse, lubenter fatebitur.

§. VII.

Observationes Clar. artis obstetriciæ DD. de
partu, ob clunes ad os uteri converfas, quas passim
fatis abunde deprehendimus, impulerunt me, ut
paulo curatius inquirerem, quænam partus nostri
ad præternaturales esset ratio. Quodsi quis, me
crambem bis coctam proponere, clamitet; quia
Doct. SCHEFFELIUS in Dissertatione *de Foetu natibus
in partu prodeunte*, jam hanc proportionem determi-
nare tentavit; is a nobis responsum ferat: *duo cum
faciunt idem, sæpe non est idem.* SCHEFFELIUS, quod



præfiscine dixerim, in hoc negotio parum accurate versatus est, atque quadrata rotundis miscuit. Sequentibus argumentis assertum nostrum probatum damus.

Primum desumptum est ab insigni proportionum differentia, quæ necessario oriri debebat, ex eo, quod partum clunibus præviis, mox cum præternaturalibus in specie, mox cum omnibus partus speciebus in genere comparavit. Secundum, quia ex MAURICEAU & GIFFARDO allegatæ proportionες nimis generales sunt. Observationum numerus a MAURICEAU publici juris factarum ad octingentas quinquaginta surgit, non septingentas quinquaginta, ut vult SCHEFFELIUS : ex his vero nonnisi dimidia pars de partibus mentionem facit, & inter ducentas viginti quinque a GIFFARDO communicatas observationes, viginti novem prostant, in quibus de partu ne gry quidem. Ut partus nostri proportionem exacte determinare possem, summa cum attentione GIFFARDI, MAURICEAU, LA MOTTE & SMELLIE observationes perscrutatus sum, partusque præternaturales primo in genere, deinde in specie
partum

partum nostrum diligenter computavi atque sequentes reperi proportiones, quibus Vener. Præceptoris mei observationes huc facientes adjungam.

GIFFARDUS inter 100. partus præternaturales 10.

MAURICEAU inter 151. - 24.

LA MOTTE inter 80. - 12.

SMELLIE inter 188. - 21.

FRIED inter 90. - 13. partus clunibus præviis observarunt.

Ex his patet, partum nostrum ad præternaturalium classem esse in ratione fere, ut $6\frac{3}{8} : 1$. minime vero, quod SCHEFFELIO placet, ut $32\frac{2}{3} : 1$. Inquiramus porro, an SCHEFFELII proportio, "inter 50. vel 60. foeminas, nullo habito partus vel facilitatis vel difficultatis respectu, unicam partum clunibus præviis eniti solere", accurata sit. Positis mil-
lenis partibus, si secundum Doct. PEGELOW *) inter 100. partus in genere, 3. partus præternaturales assumimus, obtinemus 30. partus præternaturales. Cum vero partus noster ad præternaturales in ratione est ut $6\frac{3}{8} : 1$, sequitur 5. partus clunibus præviis inter 30.

B

*) *Diff. de Fætu brachio in partu prodeunte pag. 6.*



præternaturales occurrere. Est itaque partus noster ad partus in genere, nullo habito respectu facilitatis vel difficultatis, in ratione ut 1000 : 5. vel ut 200 : 1. Evidens inde fit a SCHEFFELIO indicatam proportionem, five partum præternaturalem in specie, five partum in genere spectes, a vero longe aberrare.

§. VIII.

Quatuor partus clunibus præviis species complectitur:

Prima oritur, si foetus abdomen dorso parturientis obversum est.

Secunda, si foetus abdomen parturientis abdomen respicit.

Tertia, si ejusdem abdomen aut facies in latus quoddam parturientis conversum est. In his tribus speciebus foetus ambabus clunibus prodit.

In *quarta* specie foetus abdomini vel dorso suo incumbens, unicam tantum offert clunem. Annotandum hic erit, foetum situm mox rectum mox obliquum tenere, pedes ejus mox supra abdomen

extensos, mox in clunes reflexos, hasque mox manu mox funiculo umbilicali comitatas esse.

§. IX.

Situ, quem foetus in utero latens tenet, perspecto de partus nostri causis, nunc ut dicamus, reliquum est. Causam proximam in non peracta foetus circumvolutione positam esse, vero quam simillimum fit ex iis, quæ modo tradidimus. Conveniunt nobiscum Cel. ASTRUC & STEINIUS. Inter præcipuas vero causas remotas numerari merentur:

a) Foetus hydrops abdominis, quem casum haud pridem Exper. FRIDIUS observavit.

b) Cavum uteri angustius, id quod pessimo & exitiabili fibulatoriorum usui, atque in genere nimiae abdominis constrictioni, quocunque demum modo illa fiat, durante graviditate imprimis, attribuendum est. Qua de re legi merentur Dissert. Cl. PLATNERI c), nec non Cl. FRIDII d).

B 2

c) *De Thoracibus.*

d) *De Fætu intestinis plane nudis extra abdomen propendentibus nato.*



c) Gemelli.

d) Permagnus foetus ac simul perpauco liquore amnii circumfusus.

e) Præcoces funiculi umbilicalis circumvolutiones circa foetus collum.

f) Uteri obliquitas, unde præcipue quarta partus nostri species ortum suum ducit.

§. X.

Per omne id tempus, quo foemina in utero gerit, imo sub graviditatis finem, nulla certa signa dantur, ex quibus colligere licet, clunes uteri orificio sese oblaturas. Corpus duriusculum, mole haud parvum, ratione vero duritiei & peripheriæ capiti foetus valde dissimile, segmentum uteri inferiorius occupans, pro signo quidem præviarum clunium venditatur; ast admodum incertum est atque fallax. Nec signa a STEINIO e) allegata, majorem fidem merentur, cum & illa in aliis partibus præsto sint, quod ipsum ex §. 344. laudati Auctoris manifestum est.

e) *Anleitung zur Geburts-Hülfe II. Th. §. 331. Cassel 1770.*



§. XI.

Instante partu, si velamenta adhuc integra sunt, a nonnullis artis obstetriciæ Scriptoribus pro signis præviarum clunium hæc habentur: Quando

1) Orificii uterini apertura ex oblongo rotunda fit. vid. STEIN. *f*)

2) Velamenta aquis distenta, vesicam quidem rotundam repræsentant, quæ vero major ac latior esse solet, quam in partu capite prævio. vid. PLENK. *g*)

3) Per velamenta flaccida exploranti digito corpus quoddam magnum & rotundum sese sistit, sed mollius capite est, atque fontanella futuræque deficient. vid. PLENK. *h*)

Sed & hæc signa, cum, quod jam circa ea, quæ in §pho præcedenti allata fuerunt, monuimus, in aliis quoque præter nostrum partubus sese offerant, haud melioris notæ sunt. Nam

a) Orificii uteri apertura & ex oblongo rotunda

B 3

f) Geburts-Hülfe II. Th. §. 331. num. 4.

g) Anfangsgründe der Geburts-Hülfe p. 270. num. 1. Wien 1768.

h) p. 270. num. 2.



fit, si foetus abdomine vel dorso prodit. v. STEIN. *i)*

b) Magnam ac latam quoque formam velamentorum vesica assumit, si foetus abdomen, latus, pectus vel dorsum præbet. vid. PLENK. *k)*

Quidquod SMELLIE *l)* vesicam oblongam se observasse perhibet, licet nates præviæ essent.

c) Per velamenta flaccida & corpus quoddam magnum atque rotundum, sed capite mollius explorari potest, si humerus prævius est. Hinc SMELLIE *m)* humerum prævium suspicabatur, sed divinatio illum fefellit, nates enim exhibebat foetus. Imo sæpius ante aquarum effluxum caput, quod nates erant, reputabatur. Hoc ipsum sibi evenisse ingenue fatetur LA MOTTE. *n)*

§. XII.

Clunes non nisi post aquarum effluxus cum cer-

i) T. II. §. 344. num. 7. §. 354. /

k) p. 278. num. 1. p. 282. num. 1. p. 284. num. 2. §. p. 288. n. 2.

l) Theoretische und praktische Abhandlung von der Hebammen-Kunst T. III. obs. VI. p. 83. Altenburg 1770.

m) T. III. obs. VI. p. 87.

n) Traité complet des Accouchemens naturels, non naturels, & contre nature T. I. obs. 97. p. 487. Paris 1765.



titudine quadam sequentibus ex signis cognoscuntur.

α) Corpus illud magnum, rotundum molleque (§. XI. num. 3.) sistit nunc digito exploranti, duos quasi monticulos, carnosos, duriusculos per crenam intermediam distinctos.

β) Clunium crena s. fissura, cujus medium intestini recti apertura occupat, unumque, extremum os coccygis, alterum genitalia terminant.

γ) Meconium crassum, tenax, ex viridi nigricans, ex ano profluens, explorantisque digitum conspurcans.

δ) Crura natibus continua abdominique reflexa.

Ex his quatuor signis obstetricans, si statim post aquarum effluxum præsens fuerit, clunium præsentiam determinare valet; sed alia rerum facies, si velamentis jam diu ruptis ad parturientem vocatur; nates enim a doloribus jam in pelvim impulsæ, ibique incuneatæ adeo intumescunt, ut illæ propter magnitudinem, rotunditatem atque duritiem admodum difficulter a capite distinguantur, & anus, qui a valde compressis clunibus clausus est, nullum meconio effluxum concedit. Hoc itaque in casu nates



non nisi ex genitalibus atque cruribus abdomini reflexis cognosci queunt. En signa primæ, secundæ & tertiæ speciei.

Quartæ speciei signa adhuc magis dubia sunt. In hac enim aquæ in parva rotunda vesica sese sistunt, uti in capitis partu, & per flaccida velamenta, corpus quoddam rotundum ac duriusculum, capiti vel humero parum dissimile, sentitur. Post aquarum effluxum corpus illud duriusculum, mollitudine sua carnosâ a capite quidem facile distinguitur, sed propter maximam similitudinem, quæ inter plicam inguinis atque humeri intercedit, hæc pars facile pro humero habetur. Cum porro hoc in casu nullum meconium profluat, clunis prævia, si sola contrectatur, vix ac ne vix quidem dignoscitur. Quod si vero integra manu partes quoque circumjacentes explorantur, tunc denique ex crena, qua nates dividuntur, ano genitalibusque membrum prævium, clunem esse, cum certitudine judicamus.

§. XIII.

Si partus noster soli naturæ relinquitur, similem eventum cum aliis præternaturalibus fortitur, mox felicem

felicem mox infelicem. Foetus, si immaturi vel præmaturi fuerint, omnibus partus nostri speciebus feliciter absolvendis, solius naturæ vires fere semper sufficiunt. In maturis interdum quoque æque prosper ejus exitus est. Ast non nisi positis his conditionibus, si pelvis ampla, foetus parvus beneque collocatus (uti in prima specie) & validi ad partum dolores adfuerint. Maxime infauſtus autem eventus hujus partus fieri potest, si clunes nimis grandes vel angusta pelvis, eam, quæ inter has partes obtinere debet, justam proportionem tollunt; aut uterus, & in eo foetus obliquum situm tenet.

In tribus prioribus speciebus, clunes, si dolores ad partum validi fuerint, in pelvim quidem impelluntur; sed ob suum volumen in illo quasi incuneantur, & nisi dolores sine interruptione fortissimi fuerint, in pelvi defixæ hærent; dolores tunc cessant, foetus propter insignem & haud cessantem funiculi umbilicalis compressionem vita privatur; genitalia parturientis valide conquassata inflammantur, in gangrænam abeunt & parturiens tandem inter immanes convulsiones animam efflat. Con-



tinuis vero & validissimis doloribus ad partum, foetus quidem expellitur, sed vix non semper exanimis est, & parturiens perinæi disruptione periclitatur. Parturiens haud minori periculo in quarta specie objicitur. Hic partus enim propter situm uteri ac foetus obliquum a natura absolvi nequit, atque foetus in globum mirum in modum compressus denique una cum matre misere perit.

§. XIV.

Nunc ad Encheireses, quæ in variis partus nostri speciebus adhibendæ sunt, pedem promovemus. Hæ valde diversæ sunt, prout obstetricans citius vel ferius post aquarum effluxum manum operi admoveat. In primo casu partus soli naturæ, exiguo auxilio præstito, relinqui, aut foetus pedibus extrahi potest. In altero vero casu clunibus in pelvi incuneatis obstetricantes inter se non conveniunt, alii clunes in uterum retropellendas, alii uncis obtusis, alii fascia, alii forcipe extrahendas præcipiunt.

§. XV.

Si obstetricans statim post aquarum effluxum præsens est, nec (§. XIII.) allegatæ conditiones de-



sunt, partum naturæ committere potest; attamen ut naturæ succurrat, necesse erit, ut finum externum inungat, atque pedetentim dilatet, nates egressum molientes una manu arripiat, easque, dum altera manu perinæum leniter reprimat, motitando extrahat.

§. XVI.

Quod si autem foetus situm, quem 2. 3. & 4. speciei esse diximus, tenet, nulla habita ratione ad conditiones supra dictas, partus naturæ nequaquam relinquendus est, sed pedes investigandi extrahendique sunt, & sic partus noster in agripparum partum commutandus est. Hunc in finem obstetricans in prima & secunda specie, unam manum in utero introductam, ab externa clunis parte a femore usque ad pedem leniter promoveat, eundem supra malleolos apprehendat, & ad latus flexum educat; pari modo alterum primo jungat.

In tertia specie manus a clune ossi sacro obversa ad malleolos usque promovenda, pes supra eisdem arripiendus, in latus flectendus, atque sic extrahendus est; tum femoris supremam partem capiet,



foetum paulisper ad uteri fundum repellat, illum ita vertat, ut abdomen ejus respiciat deorsum, tandem & alterum pedem educat. Eadem methodo in quarta specie obstetricans manum a clune prævia ad pedem usque dirigat, eum supra malleolos prehendat, ad latus flexum educat, femur arripiat, foetum ad latus dimoveat, ut eo facilius in opposito latere pedem investigare atque extrahere valeat. Plurimi obstetricantes quidem in partu nostro consilium dant, nonnisi unicum pedem educendum, hunc una manu præhendendum foetumque ea educendum, usque dum clunes appareant, tunc digitum unci modo incurvatum in inguen immittendum, & ita ambabus manibus foetum supra nates extrahendum esse. Ast cum tractione unius pedis foetus situm obliquum ut plurimum nanciscatur, & altera natium ossium pelvis cuidam impingatur, ulterior extractio foetus eo difficilior, imo plane impossibilis redditur, nisi quoque pes alter deducatur. Magis consultum esse duco, si ambos pedes educat, iisque foetum extrahat. Nec Encheireses peculiares PLENKII o) atque

o) p. 276.



DELEURYE *p*) silentio præterire possumus. Suadent uterque, ut in secunda specie nates integra manu arripiantur, foetus in latus volvatur & tunc demum pedes educantur. Eandem encheiresin in prima specie quoque commendat DELEURYE *q*). Verum enim vero in utraque specie hacce encheiresi supersedere possumus, in prima enim specie, pedes dorso parturientis obversi, facili negotio arripi, extrahique possunt, & in secunda specie, si pedes supra os pubis collocati attingi nequeunt, parturiens solummodo vel in latus collocetur vel genubus nitatur, tunc facillime assequi poterunt. Nec magis consilium BURTONI *r*), ut nates repellantur, ac foetus ita volvatur, ut mox dorsum mox abdomen orificio uteri obvertatur, sequendum esse arbitror.

§. XVII.

Exponendum nobis adhuc erit, quomodo partus, ubi clunes, aquis jam diu effluxis, in pelvi-

C 3

p) *Traité des Accouchements* p. 215. §. 669. Paris 1770.

q) p. 668.

q) *Système nouveau & complet de l'art des accouchements*, traduit par Mr. Le Moine, pag. 309. & 312. Paris 1771.



quasi incuneatæ hærent, dirigi debeat. Hic casus solummodo in tribus prioribus speciebus locum habet. Caussas & exitum, si partus naturæ committitur, §. XIII. descripsimus. Varias encheireses, quæ hætenus in hoc casu a variis obstetricantibus commendatas vidimus, nunc examinare lubet.

§. XVIII.

Cum in hoc casu plane fieri nequit, ut juxta clunes incuneatas manus in uterum ducatur & pedes extrahantur, alii ad nates unam manum applicandam & vi quadam in uterum retrudendas præcipiunt, sed uterum quam maxime contractum, & resistentem foetum fortiter compressum, ac pelvi infixum, hanc clunium repulsionem plane impossibilem reddere, quis est qui non videt? His adde, quod nimia adhibita violentia, uteri vel vaginæ lethifera metuenda erit ruptura.

§. XIX.

Alii, cum laudatam natium repulsionem facilius describi, quam perfici viderint, sequentem encheiresin proposuerunt, nimirum ut index utriusque ma-



nus unci instar curvatus in inguinis plicam injiciatur, iisque præsentibus ad partum doloribus, clunes educantur. Hæc methodus quanquam, nonnisi clunibus jam profunde in pelvim depulsis, locum habere potest. Cum vero nimis alte hærentibus & fortiter in pelvim compactis clunibus, digiti in inguem immitti nequeunt, eorum in locum uncinos obtusos substituerunt. Hunc in finem SMELLIE s) præcipue uncinos suos obtusos commendat. Cum vero nonnisi quadam vi adhibita in inguina injici possint, ne foetus inde vulneretur, metuendum erit, id quod GIFFARDO t) accidit. Imo, si nimia vis ad extrahendas clunes valde incuneatas adhibetur, perfacile femora vel luxari vel rumpi poterunt. His ex causis nec uncinorum usum in hoc casu suaderem.

§. XX.

Ab hac encheiresi parum differt illa, a magnis quoque Viris proposita, qua nates scilicet fascia per inguina ducta, educendas esse præcipiunt. Hanc methodum jam PEU u) laude sua ornavit, qui peculiarem quoque pro fascia applicanda uncum fenestratum depi-

s) *Tab. 37.*

t) *Cases in Midwifry p. 489. Cas. 213. London 1734.*

u) *La pratique des Accouchements p. 420. fig. 13. Paris 1694.*



Etum dedit. GIFFARD α) se, tali in casu fascia per inguina tracta, optimo cum successu usum fuisse, jactat. Sed minime comprehendere possum, quomodo fasciam per inguina duxerit, cum ipse confiteatur, nates tam fortiter in pelvim compactas fuisse, ut digitis uti non potuerit. Eandem opinionem fovet SMELLIE γ); sed fac fasciam applicari posse, de quo adhuc valde dubitamus, attamen semper auxilium periculi plenum erit, monente enim SMELLIE, si magna vis, pro extrahendis clunibus, adhibenda esset, fascia non cutis solum detraheretur, sed & partes carnosæ usque ad ossa dissecarentur.

§. XXI.

Plurimi tandem recentiores obstetricantes, pro extrahendis clunibus incuneatis, forcipem laudant. Licet pro hoc scopo præprimis curva LEVRETI forceps commendetur, tamen de curva forcipe SMELLIE atque Cl. FRIDII æque felicem eventum polliceri possumus. His omnibus vero, liceat ingenue fateri Johnsonianam tanquam optimam longe præferrem.

Nota. Iniqua est Cl. STEINII de hac forcipe sententia, experientia enim præceptorem meum ac me ipsum de ejus præstantia in partu capite prævio dubitare non finit.

Felici

α) Obs. 47. p. 101.

γ) T. I. p. 353. Altenburg 1755.



Felici cum successu aliqua ex dictis forcipibus in prima & secunda partus nostri specie utimur. Secundum easdem regulas, quas in partu capite prævio observandas esse docent, adhibenda est, atque nates sub iisdem cautelis sensim sensimque attrahendæ, usque dum inguina in sinu pudoris appareant, tunc forceps seponitur, digiti incurvati inguinibus infiguntur & sic in prima specie foetus protrahitur, usque dum pedes sponte ex vagina decidunt; in secunda vero specie foetus solummodo supra clunes educitur, & tunc in abdomen revolvitur. Si autem in tertia specie partus nostri clunes jamjam in pelvi incuneatæ hærent, quomodo extrahendæ sint, nunc videamus. STEINIUS (§. 762.) in hoc casu peculiarem encheiresin commendat, nempe unum tantum ex cochlearibus forcipis Levretianæ, sed valde dubito, clunes incuneatas hac methodo tam facile in majorem pelvis diametrum moveri posse. Imò vereor, ne vi adhibita vagina, præcipue labium posterius orificii uteri nimis comprimatur atque inflammetur. Veniam a Clar. STEINIO me facile impetraturum confido, si tam diu de encheiresi ab eo laudata dubitavero, donec ipsi placuerit pluribus observationibus accurate institutis nobis eandem probatam dare. Quodsi vel maxime hæc encheiresis locum invenire posset, ut ipse sibi persuasit in hoc casu æque ac in illo, ubi humeri inter pubem & os sacrum, capite jam nato, incuneati sunt, equidem encheiresin sequentem illi Steini- anæ longe præferendam esse, nullus dubito. Obstetri-



cans integra manu in vaginam demissa, amplectatur clunem ossi sacro infixam, eamque ita ad latus revolvat, ut foetus abdomini incumbat, atque nates majori diametro aperturæ superioris pelvis respondeant. Cum Clar. FRI-DIUS humeris incuneatis simplici æque ac tutissima hac methodo, me præsentem, felicissimo cum successu usus est, atque adeo experientia suffragatur, eandem encheirefin in nostro casu, qui ab illo parum distat, æque prospere successuram omnino persuasum habeo. Si autem hac encheirefi clunes in situm justum reductæ fuerint, forcipem Johnsonianam applicandam, natesque lege artis extrahendas suaderem.

§. XXII.

Ex præcedentibus itaque patet, partum nostrum clunibus præviis sub certis conditionibus naturæ relinqui posse, his vero deficientibus pedes extrahendos, atque partum nostrum in Agripparum partum esse commutandum, quod si vero hoc, ob clunes in pelvi jamjam infixas, fieri nequit; tunc durantibus ad partum doloribus clunes jam profunde in pelvim defixæ digitis uncinorum instar incurvatis inguinibusque injectis, educendæ erunt. Verum si clunes in pelvim incuneatæ hanc encheirefin quoque irritam reddiderint, ultimo loco obstetricanti ad forcipem confugiendum esse arbitror. Et licet PLENK 2) eandem valde periculosum esse credat, tamen optimum tutissimumque hoc in casu remedium esse, docuit experientia.

2) p. 275.